

四庫全書

子部

欽定四庫全書

子部

名賢氏族言行類稿卷二十九至

詳校官典籍臣潘奕雋

主事臣祁韻士覆勘

總校官進士臣朱 鈐

校對官中書臣張曾炳

騰錄監生臣史殿榮

欽定四庫全書

名賢氏族言行類稿卷二十六

宋 章定 撰

章 四百四十二

姓纂姜姓齊太公支孫封鄆左傳齊人降鄆子孫改  
為章氏章子齊威王將

漢書章邯為秦將項羽封為雍王王關中

南史章昭達字伯通吳興人性倜儻輕財尚氣累立戰

功為定州刺史文帝嘗夢昭達升台鉉及旦告之後  
曰何以償夢對曰當効犬馬之用以盡臣節自餘無  
以奉償尋遷都督江州刺史位至司空

章華字仲宗通經史善屬文後主時以忠諫獲罪得名  
陳武宣章皇后 吳興烏程人本姓鈕父景明為章氏  
所養因改姓焉今族系亦廣侯詢問添入

唐章全益梓州涪城人少孤為兄全啟所鞠母病全啟  
剗股膳母而愈及全啟亡全益服斬衰斷手一指以

報不畜一僮僕處一室賣藥自業居成都四十年號  
章孝子

章仔鈞其先岳仕晉永嘉中守泉州因家焉後唐季為  
建州刺史後由南安徙居建之浦城生子修修生仔  
鈞仔釗仔鈞甘貧好學居鄉有賢行天祐間王審知  
守福州謙抑下士中朝避地者多依之仔鈞往見授  
以三策審知大喜承制授高州刺史檢校太傅付以  
步騎五千屯于浦城西巖山控制二瀨之衝幾二十

年子孫因居巖之西村娶練氏生子十五人仁嵩仁  
徹仁郁三人皆能顯仕得象友直子厚濠誼望之衡  
元振今樞密良能大著良肱皆其諸孫也世傳以為  
練氏保全二校陰德之致

一枚為王建封一  
校建人云姓鄭

仔釗

生四子復留南安諸孫亨鐸移居西蜀梓綿之間  
亨鐸之孫君陳嘗為福建提刑向侍郎森疑是亨鐸  
之後

宋朝章得象字希言生時父夢庭積象笏因以得象為

名舉進士為大理評事知玉山縣寶元間拜相仁宗  
謂曰先太后臨朝羣臣邪正朕皆點識之卿清忠無  
所附麗故大用也性端重在翰林十二年怡然自得  
處相位八年親戚子弟皆抑而不進後封郟國公卒  
諡文簡

章友直皇祐中近臣言其能文章善篆有旨召試辭焉  
後太學篆石經近臣又薦之召往經成除試將作監  
主簿不就王荆公銘其墓曰昔列禦寇莊周當文武

末世哀天下之士沈於得喪陷於毀譽離性命之精而自託於大偽以爭須臾之欲故其所稱述多謂

闕

若友直者似之矣

章惇字子厚當始生族父得象竒其風骨以為必貴舉進士甲科知商洛縣嘗與蘇軾同遊南山抵仙遊潭潭下臨絕壁萬仞岸甚狹子厚推軾下潭書壁軾不敢子厚履險而下以漆墨濡筆大書石壁上曰蘇軾章某來軾拊子厚之背曰子厚異日得志必能殺人



厚曰何也軾曰能自拚命者能殺人也子厚大笑元豐間拜門下侍郎知樞密院事哲宗親政召拜左

僕射後封申國公子援持皆擢甲科諸孫傑潛泳深

解洽

闕

梓等相繼登第

章案字質夫始以世父得象廕為將作監主簿旋復舉

甲科知陳留縣以最擢提舉湖北刑獄稍遷直龍圖

閣知慶州後守涇原四年凡置州一城砦九夏人剽

剽復舊境徽宗即位除同知樞密卒諡莊敏七子

緯綜綜縮緹續續 緯登進士第歷官戶部員外郎

出為淮東提刑會蔡京更鈔法江淮富商變為流丐  
赴水死相繼緯上言變法誤民乞如初以存大信京  
怒逐之綜嘗轉漕陝西孫覲為銘其墓時言者闕

之孫潭之子也

東坡先生與子厚帖云某自得罪以來雖至親骨肉  
未肯有一字來往忽蒙賜書存問甚厚憂愛深切感  
歎不可言也某所以得罪乎時惟子厚與子由極口

見戒反復甚苦而其強狠自用不以為然追思所犯  
真無義理而公乃疑其再犯豈有此理哉然異時相  
識但過相稱譽以成吾過一旦有患難無復有相哀  
者惟子厚平居遺我以藥石及困急又有以救恤之  
真與世俗異矣 與質夫帖云屢承下訪芻蕘不肖  
豈復有所見出公之意表者但竊聞一事公會用香  
藥皆珍異之物極為番商坐賈之苦益近歲始造此  
列公若一奏罷之雖不悅者衆然於陰德非小補也

某與公皆高年實無復絲毫有求於人者所孜孜慕望雅及物之功以資前路不厭多爾非質夫豈出此言千萬裁察

慎靜以處憂患非公愛我之深何以及此謹書之座右也柳花詞妙絕使來者何以措辭本不敢繼作又思公正柳花飛時遠出巡按坐想四子閉門愁斷故寫其意次韻一首寄去亦可勿示人也

多日不奉書狀蒙庇如昨但侍者病亡旅懷不免牢

落方營墓之更何可了目前紛紛須已事乃釋然耳  
有詩悼之其畧曰傷心一念還前債彈指三生斷後  
緣恐公欲知鄙意不深念也數日前颶風淫雨繼作  
寓居牆穿屋漏草市已在水底蔬肉皆闕方振履而  
歌商頌書生強項類如此想聞此捧腹掀髯一絕倒  
也

朝雲葬豐湖上栖禪寺松林中前瞻大聖塔日聞鐘  
梵墓得如此不負其宿性頃嘗學佛法於泗上比丘

尼義空亦粗知大意且死誦金剛經四句偈乃絕因  
蒙公記憐之故一報也

右東坡先生所與申公丞相莊敏樞密數帖後有  
蘇邁大觀四年八月二十九日嘉興幕下跋語定  
敬附之二公傳後庶有以見前輩相與無間於憂  
患之際者如此

章誼紹興七年試戶部尚書後除端明殿學士知建康  
章望之字表民浦城人也好學有文用從父得象廕為

校書郎監杭州茶庫逾年辭疾去舉賢良得象在相位以嫌扼之遂不復仕浮游江湖犯艱苦以營衣食不自悔歐陽脩韓絳吳奎劉敞范鎮同薦其才除僉書建康軍節度判官不赴又除知烏程縣趣令受命固辭

章衡字子平嘉祐二年擢進士第一通判湖州歷守臨江汝潁濱真定滁秀襄曹河陽越陽廬宣十四州終寶文閣侍制帥真定時滹沱河每春瀰漫為民患衡

為橫隄二十餘里以障其衝突民獲安處甚懷之  
鄉本云太傅公之下徙居括蒼者有三焉龍泉之橫  
塘麗水之東鄉青田之界首是以又有自括蒼而移  
霄者數世既遠莫得而詳焉思廉者括蒼人自贊其  
喜神云狂走兀坐端立靜眠默而不默顛而不顛漏  
身無脫且守三田人以為怪我以自然思廉得道靈  
異之事見於處州天慶章真人畫象石刻

章服乾道間為侍御史吏部侍郎聞亦是仔鈞之後



章元振字時舉仁嵩之後登進士第建炎初知邵武軍  
泰寧縣盜賊四起而鄉兵寡弱元振度公私之力不  
足抗賊遂據險立砦遷民帑庾於其中率百姓堅守  
闔境獲全後知潮州二廣去朝廷遠官吏奉法者鮮  
元振一以法從事民作歌謠美之移守肇慶監司薦  
其治績遷廣東提舉常平元振與秦檜為同年生檜  
當軸久甘於遠宦未嘗以私書干之也

見建安志并  
忠興紀事

子才邵篤學能文兩預鄉貢以父廕補官嘗守臨

賀辰陽少年謁龜山楊先生時龜山誨以熟讀論語  
將論仁處仔細翫味而躬行之自後日用踐履莫非  
所聞所知者故世目為篤實君子性喜賦詩題巖子  
陵釣臺有云短棹夷猶七里灘人亡依舊水光寒漢  
家名節君知否盡在先生一釣竿過清遠大家峽云  
巖頭風急樹欹斜溪畔漁樵十數家老盡往來名利  
客年年秋水映蘆花晚歲閒居時與晦公朱先生游  
荊州之行晦翁餞之詩曰雄藩荆楚地自古國西門

客有籌邊畧人知幕府尊云云劉清之和云誰云兩  
州牧擇笏望轅門渠亦髭鬚好公今德義尊

見黃永  
存大監

所著  
行狀

唐柳子厚記其先友六十有四人自姜公輔而下功  
名事業見諸史傳者過半定先辰陽公時交友皆天  
下士往來親墨什襲具在共四十有九人道德勲名  
其視姜公輔之儔固已凌厲超越而先君雖微實與  
榮也定肅列官位于右

陳丞相

俊卿

葉丞相

顯

王丞相

淮

周丞相

必大

京丞相

鏗

謝叅政

字開之

葉樞密

義問

析樞密

彥質

林尚書

大舜

韓尚書

元吉

張尚書

大經

張尚書

杓

洪內相

邁

朱待制

熹

林侍郎

機

韓待制

駒

李侍郎

安國

顏侍郎

度

應侍郎

孟明

劉侍郎

國瑞

周侍郎

武

章侍郎

熹

蘇給事

嶠

張侍講

棧

陳舍人

居仁

熊舍人

克

林侍御

行可

徐察院

誦

蘇大卿

諤

施大卿

溫舒

詹大卿

體仁

王大卿

齊與

汪大卿

作礪

邵祭酒

知

李提舉

若川

黃太監

永存

陳左司

仲諤

黃右司

適

傅郎中

自得

黃郎中

公度

婁宮師

壽

林郎中

枏

虞郎中

似良

趙郎中

不邊

吳郎中

汁

劉湖州

清之

黃敷文

仁榮

呂寶文

企中

沈運使

度

康

四百四十三

康繼英字伯雄保裔戰歿特授六宅使後為桂州觀察使繼英謂戎人雖內附而終蓄姦謀乃大索其所反

覆者蕩除於是威震西鄙繼英嚴於馭軍而厚於撫  
宗族故其卒也家無餘財

萇

四百四十四

姓纂左傳周大夫萇弘之後大歷有奉天尉萇總

五代萇從簡陳州人也事晉為軍校力敵數人善用槊  
莊宗用兵攻城從簡多為梯頭莊宗愛其勇以功累  
遷步軍都指揮使莊宗與梁軍對陣梁軍有執大旗  
出入陣間者莊宗登高丘望見之歎曰彼猛士誰能

為我取之者從簡因前請往莊宗惜之不許從簡潛  
率數騎馳入梁軍奪其旗而還軍中皆鼓噪莊宗壯  
之賜與甚厚從簡嘗中流矢鏃入髀骨命工取之工  
無良藥欲鑿其骨人皆以為不可從簡遽使鑿之工  
遲疑不忍下從簡叱其亟鑿左右視者皆若不勝其  
毒而從簡言笑自若後降晉歷鎮忠武武寧入為左  
金吾衛上將軍卒

常 四百四十五

姓纂衛康叔支孫封常邑因氏焉一云黃帝臣常先  
後

前漢常惠太原人自奮應募隨蘇武使匈奴拘留十餘  
年還拜為光祿大夫奉使烏孫封長羅侯 後為典  
屬國明習外國事勤勞數有功卒諡壯武

魏志常林字伯槐自非手力不取之於人 帶經耕鋤  
梁習薦州略名士於太祖以為南和宰治化有成超  
遷博陵太守幽州刺史所在有績 魏初拜尚書轉



大司農時論以林節操清峻欲致之公輔林遂稱疾篤拜光祿大夫能不繫心於三司以大夫告老美哉北史常爽字仕明少而聰敏嚴正有志槩家人僮隸未嘗見其寬誕之容 明習緯侯五經百家多所研究置館溫水之右教授門徒七百餘人號為儒林先生高允稱之曰文翁柔勝先生剛克立教雖殊成人一也 孫景字永昌雅好文章初為協律博士後為雍州錄事參軍帶長安令甚有惠政人吏稱之召還修儀注

兼中書舍人善與人交終始若一澹於榮利不事權門耽好經史愛翫文辭清德自居不事家業

唐常袞京兆人及進士第不妄交游為中書舍人文采瞻蔚長於應用譽重一時魚朝恩倚寵兼判國子監袞奏成均之任當用名儒不宜以宦官領職又天子誕日諸道爭以侈麗獻袞以為若易芻粟以減貧民之賦天下之福也代宗嘉納拜門下侍郎同平章

事袞苛細而以清儉自賢 元載王縉之為相也上  
日賜以內厨御饌遂為故事袞與朱泚上言餐錢已  
多乞賜停饌許之袞又欲辭堂封同列不可而止時  
人譏袞以為朝廷厚祿所以養賢不能當辭位不當  
辭祿 司馬溫公曰君子耻食浮於人袞之辭祿廉  
耻存焉與夫固位且貪祿者不猶愈乎詩云彼君子  
兮不素餐兮如袞者亦未可以深譏也 建中初為  
福建觀察使始閩人未知學袞至為設鄉校使作為

文章親加講導與為客主鈞禮觀游燕饗與焉由是俗一變歲貢士與內州等卒後閩人春秋配饗衮子學官云

常達陝州人從高祖征伐帝曰君忠節正可求之古人五代常思字克恭太原人也初從唐莊宗漢高祖入立領武勝軍節度使初思微時周太祖方少孤無依食于思家以思為叔後思與周太祖俱遭漢以取富貴周太祖已即位每呼思為常叔拜其妻如家人禮廣

順間徙鎮歸德

宋朝常安民字希古蜀人也幼穎悟力學舉進士為成都府教授代還上書論強國之本元祐中公卿薦其才召為太常博士遷太常正丞開封府推官紹聖初召對極論元祐言者以熙豐為非今日言者以元祐為非是皆一偏也願擇其中又論蔡京姦足以惑衆辯足以飾非巧足以移奪人主之視聽力足以顛倒天下之是非內結宦侍外連臺諫合黨締交以圖柄

任陛下不早逐之它日悔將安及董敦逸再為御史復欲彈蘇軾兄弟安民止之敦逸乃言安民主元祐謫監滁州鹽酒務除永興路提點刑獄蔡京用事改通判郟州入黨籍卒

常秩字夷甫潁州汝陰人也長於春秋居于陋巷二十餘年澹如也歐陽修王安石聞而稱之士論亦翕然歸重嘉祐中修薦于朝以為潁州教授又除國子監直講又以為大理評事知長葛縣皆不赴於是聲名

愈高神宗聞其名詔有司以禮敦遣入對神宗  
問曰當今何以免民凍餒秩言法制不立當今之大  
患也熙寧七年除寶文閣待制兼侍讀歸穎卒初秩  
隱居求志不肯出仕世以為高及介甫更新法秩以  
為是被召遂起云

莊

四百四十六

姓纂芊姓楚莊王之後以諡為姓楚有大儒莊生六  
國時為蒙漆園吏莊周著書號莊子齊有莊賈周有

莊辛

新序白公之難楚人莊善者辭其母將徃死之其母曰  
棄其親死其君可謂義乎莊善曰吾聞事君者內其  
祿而外其身今所以養母者君之祿也身安得無死  
乎

史記莊子蒙人名周嘗為漆園吏其學無所不闕著書  
十餘萬言詆孔子之徒明老子之術自王公大人不  
能器之終身不仕



匡 四百四十七

姓纂左傳魯匡邑宰匡句須之後廬山記威王時有

匡裕先生

史記匡衡東海人也從博士授詩數射策不中至九乃  
中丙科後遷御史大夫為丞相封樂安侯十年之間  
不出長安城門而至丞相 漢書云孔稚圭諸儒為  
之語曰無說詩匡鼎來匡語詩解人頤 當世少雙  
子咸亦明經歷位九卿家世多為博士者

南史孝義匡昕字令先有至性母病亡已經日昕奔還

號叫母即蘇皆以為孝感所致

見解叔  
誦傳

強 四百四十八

姓苑丹陽有強氏將石趙常山太守強容

北史藝術強練

唐強循字季先鳳州人累遷雍州司士叅軍華原無泉  
人畜多渴死循教人渠水以浸田一方利之號強公

渠

皇朝強獻明字可季汪藻嘗銘其墓曰錢塘強氏以文學顯熙寧間有子五人曰浚明淵明偉明陟明獻明兄弟復以文學踵相躡登進士第淵明入翰林為學士承旨諡文獻浚明自尚書郎奉使吳中偉明陟明皆有名績以沒獻明召掌戶部架閣文字浚明子行父亦能世其家

郎 四百四十九

姓纂魯懿公孫費伯城郎因居之子孫氏焉

後漢郎覲字雅光父宗學京氏易能望氣占候吉凶覲少傳父業兼明經典晝研精義夜占象度順帝時拜章論災異後拜郎中辭病不就

北史郎基字世業汎涉文籍尤長吏事仕齊為侍御史不憚權威後帶潁川郡守積年案狀數日判盡一條網既踈獄訟清靜清慎無所營求嘗語人云任官之所木枕亦不須作况重於此乎唯頗令人寫書潘子義遺之書云在官寫書亦是風流罪過子茂字

蔚之七歲誦騷雅日千餘言以博學稱除衛國令歷  
年辭訟不詣州省開皇中遷戶部侍郎

節義郎方貴弟雙貴方貴嘗為舟人折臂雙貴恚恨遂  
毆殺舟人執送州縣兄弟爭坐死隋文特原其罪表  
其門閭後為州主簿

唐郎餘令定州人祖穎字楚之與兄蔚之俱有名餘令  
擢進士第授霍王府叅軍從父知年亦為王友元軌  
曰郎家二賢皆入府不意培塿而松柏為林也 徙

幽州錄事叅軍有為浮屠者積薪自焚長史率官屬  
將觀餘令曰違茂教義公當察之長史按之果得其  
姦

郎餘慶為吏清而刻於法高宗時為萬年令道無拾遺  
方四百五十

姓纂周大夫方叔之後風俗通云方雷氏之後

唐方干隱居鑑湖任情漁釣有詩集一編葛常之嘗稱其  
野渡波搖月空城雨翳鐘之句

方蒙字達源嚴之桐廬人元祐中為御史三子元修元若元矩皆有才名于宣政間元修宣和末曾入徐擇之大名幕府元若嘗為右史少卿元矩亦典郡元修子即務德也

莆田諸方唐末一名琚者來於光州之固始一名閱者元居白杜塘之西一名達者五代間為泉州長史因家於方山及游洋鎮琚之下則有謹言嘗為諫議大夫閱之下則有會終顯謨閣待制子容守惠州東坡

時謫居與之往還家藏坡公墨跡甚富容長孫畧崇  
寧間登進士第歷潮瓊二州廣東運副達之下則有  
偕為天章閣待制充江淮發運三家之後時有登科  
者

方崧卿字季申亦莆田居不知何別也隆興初登進士  
第繼中教官歷守南安廬陵廣東提刑轉漕廣西京  
西莆田人物志謂其平時接物和氣三十年安分有  
守始終所得祿俸半為抄書之費子信孺今倅肇慶



商 四百五十一

姓纂殷或號曰商以國為氏魯有商瞿仲尼弟子秦有衛鞅本衛公子也受封於商子孫氏焉

國語夫成天地之大功者其子孫未嘗不章虞夏商周是也商契能和合五教以保于百姓其後皆為王公侯伯

左傳襄二十三年齊侯伐衛商子車御侯朝商子游御夏之御寇

史記商瞿魯人字子木孔子傳易於瞿

商澤家語曰字子季

昌 四百五十二

風俗通云黃帝子昌意之後

南史昌義之烏江人少有武幹梁武帝用為輔國將軍  
每戰必克大破魏軍進號軍師將軍又為徐州刺史  
為將能得人死力及居藩任吏人安之

名賢氏族言行類稿卷二十六

欽定四庫全書

名賢氏族言行類稿卷二十七

宋 章定 撰

黃 四百五十三

姓纂陸終之後受封於黃後為楚所滅以國為氏

史記黃歇楚人也封為春申君既相楚與孟嘗君等方

爭下士招致賓客以相傾奪輔國持權客三千餘人

其上客皆躡珠履 新序云楚使黃歇使於秦秦昭

王方使白起與韓魏共伐楚黃歇適至聞其計上書於昭王昭王乃止黃歇受約歸楚解弱楚之禍全強秦之兵黃歇之謀也

黃霸淮陽人也為潁川太守治以禮義道不捨遺男女異路獄無重囚賜爵關內侯召為京兆尹後至丞相漢書云霸字次公為潁川守力行教化而後誅罰咸稱神明 不易聾丞 田者讓畔治為天下第一霸材長於治民及為相功名損於治郡 所居民富

所去見思

循吏傳

後漢黃憲字叔度汝南人陳蕃周舉嘗相謂曰時月之間不見黃生則鄙吝之萌復存乎心郭林宗曰叔度汪汪若千頃波澄之不清滄之不濁 初舉孝廉又辟公府暫到京師而還竟無所就 隕然其處順淵乎其似道

黃瓊字世英江夏人公卿多薦之公車徵拜議郎遷尚書僕射初隨父在臺閣習見故事及後居職練達官

曹爭議朝堂莫能抗奪轉太尉封祁鄉侯居公位舉  
秦州郡素行貪污至死徙者十餘人海內由是翕然  
望之

黃琬字子琰瓊之孫幼而辯慧對日食云日食之餘如  
月之初遷五官中郎將

黃允字子文以雋才知名郭林宗見而謂曰卿有絕人  
之才足成偉器然恐守道不篤將失之矣後司徒  
袁隗欲為從女求婚見允而嘆曰得婿如是足矣允

聞而黜遣其妻夏侯氏婦辭去數允隱匿穢惡十五事允以此廢於時

酷吏黃昌字聖真拜宛令政尚嚴猛好發姦伏大姓戰懼皆稱神明遷蜀郡太守宿惡大姦皆奔走他境

黃香字文疆江夏人九歲失母思慕憔悴鄉人稱其至孝京師號曰天下無雙江夏黃童除郎中肅宗詔香詣東觀讀所未嘗見書累遷尚書令後以為東郡太守上疏讓曰臣少為諸生典郡從政固非所堪

蜀志黃忠字漢升勇毅冠三軍為後將軍疆擊壯猛用作爪牙

黃權字公衡在蜀為鎮北將軍降魏為車騎將軍司馬宣王問曰蜀中有卿輩幾人又曰黃公衡快士也

吳志黃蓋字公覆零陵人凡守九縣所在平定赤壁之後建策火攻後加偏將軍為江表之虎臣

晉藝術黃泓字始長妙天文秘術兼博覽經史

南史黃回拳捷果勁勇力兼人



黃法氈字仲昭少勁捷有膽力以戰功授平南將軍後  
為豫州刺史

唐黃碣閩人喜學問軒然有志向同列有假其筆者怒  
曰是筆它日當斷大事不可假董昌為威勝軍節  
度使表碣自副及昌反碣諫曰大王拔田畝位將相  
不能盡忠王朝乃自尊大誅滅無種矣

宋朝黃履字安中邵武人也少遊太學舉進士召試為  
館閣校勘後御史中丞相時大臣有罪罰金履奏賈

誼有言遇之以禮則羣臣自喜嬰之以廉耻則人矜  
節行羣臣且然况大臣乎故罪有可惡黜之可也  
可恕釋之可也豈可以罰金示辱哉御史翟思言事  
有旨詰所自履諫曰御史以言為職非有所聞則無  
以言今乃究其自來則人將懲之而臺諫不復有聞  
矣恐失開言路之意事遂寢哲宗即位請外知越  
州召還復為御史中丞上章乞黜責呂大防之黨以  
正典刑徽宗即位召拜尚書右丞

黃葆光字元暉歙州黟縣人也少孤立志於學崇寧初以朝廷遣使航海撫諭高麗使副辟之以行補官調齊州司理叅軍近臣薦其才召遷監察御史左司諫言事切直會歸明人李良嗣撰北征錄平邊書規進用命以為祕書丞葆光上疏論五不可謂良嗣以忤黜忿驚之資犯肆赦不原之罪亡命沙漠免死而已妄作平邊等書萬一語泄致生嫌疑為患不細祕書省圖書之府以外人為之有累國體時三省密院史

負猥雜葆光言非元豐舊制今奉入則越從班品秩  
則幾執政輕茂名器蠹耗國用無敢誰何吏疆官弱  
未有如此徽宗嘉納之於是非元豐法所載一切  
罷去因入對徽宗以旱乾為念葆元退而上疏曰  
人君有屈已逮下之心而人臣無歸美報上之意者  
能致陰陽之變人君有惠慈惻怛之心而人臣無柔  
順欽承之意者能致陰陽之變葆光天資剛正尚氣  
節善論事會文切理不為橫義所移

黃庭堅字魯直洪州分寧人幼警悟讀書數過輒成誦  
舅李常見之以為一日千里舉進士調葉縣尉又為  
大名府國子監教授初蘇軾見庭堅詩於孫覺之坐  
上異之後遇李常于濟南見其詩以為超逸絕塵獨  
立萬物之表者由是聲名始震召為校書郎為神  
宗實錄檢討官始庭堅與秦觀張耒晁補之皆游蘇  
軾之門號四學士一文一詩出人爭傳誦之紙價為  
高而庭堅之詩尤妙晚節位益黜名益高世以配蘇

軾謂之蘇黃庭堅嘗游瀟皖樂山谷寺石牛洞之林泉因自號山谷道人天下皆稱曰山谷而不名字之先蘇軾嘗薦庭堅自代其略曰瑰瑋之文妙絕當世孝友之行追配古人世以為實錄云今大卿肇通守榮寺簿留聞皆先生之後

黃公度字師憲莆田人父靜嘗為京畿提舉公度紹興間御試第一人不偶時相久方召為考功員外郎有知稼翁集十二卷陳正獻洪內翰為序跋公度喜作

詩倅肇慶日與定之先生唱和有句云嗜酒揚雄官  
拓落耽詩沈約瘦伶俜何時把臂論今古經庫勞君  
一啟扃子浩嘗知邵州鉞亦俱登科乃公度之諸孫

也

見莆陽志

黃裳字冕仲南劔州人元豐間擢進士第一人官終尚  
書贈端明殿學士自叙其平生所為文云演峯之下  
劔潭之濱予家在焉牛斗之光上下相照風雷之信  
有時變現而予常以自適獨遊乎其間或曳履以穿

雲或擊舟而泛月惟意所在乘興而言收拾遺藁得若干卷故以演山名其集王溫州悅為誌其首

黃中美字文昭其先自光州徙閩遂為昭武人元祐間登進士第歷官朝議大夫信德府司錄事晦翁朱先生嘗誌其墓曰熙寧以來羣小相師士大夫酣秦之餘心志潰爛不可收拾宜其禍變危迫而皆不知以為憂倉卒迎降而皆不知以為耻棄君叛父奉賦稱臣而皆不知以為辱也而猶復有如公者出於其間



金人入城官吏拜降惟恐居後公獨奮然誓死不屈  
變姓名匿里巷中寇退乃出還次京師適遭變故城  
中擁張邦昌而立之一時公卿俛首聽命公獨感憤  
投檄致其事以去子永存字堅叟以才能有聞于世  
上聞其名召為尚書郎軍器堅出為淮南轉運副使  
孫龜朋今為南雄守曾孫大金陳亮榜登科改秩見  
待南城之次

城 四百五十四

姓纂魯孝公子彊食采於臧是為僖伯

家語好生篇漆雕憑曰臧氏家有守龜焉名曰蔡文仲

三年而為一兆武仲三年而為二兆孺子容三年而

為三兆

文仲魯大夫臧孫辰也武仲臧孫紇也子昭伯從弟臧會

顏回篇顏回問曰臧文仲武仲孰賢子曰武仲賢哉

國語魯語篇魯饑臧文仲言於莊公曰君盍以名器請

糴於齊公曰誰使對曰辰也備卿臣請如齊

仲尼曰有臧武仲之知不容於魯

左傳隱五年公將如棠觀魚臧僖伯諫曰凡物不足以

講大事其才不足以備器用則君不舉焉

僖伯魯公子  
強之子也

桓二年取郕大鼎於宋納于太廟臧哀伯諫周內史聞

之曰臧孫達其有後於魯乎君違不忘諫之以德

哀伯

僖伯之子名

達曰臧孫氏

臧宣叔臧孫許也

文仲子

襄十七年齊侯代我北鄙師自陽關逆臧孫至於旅松

鄆叔紇臧賈臧疇帥甲三百宵犯齊師

後漢臧宮字君翁潁川人從光武征戰諸將稱其勇從

金史卷之八十一  
卷二十七  
破羣賊數陷陣卻敵拜輔威將軍謹信質朴常見任  
用封朗陵侯撫鳴劍而抵掌志馳伊吾之北

魏志臧洪字子源父旻歷中山太原太守所在有名洪  
舉孝廉為郎太守張超請為功曹稱其才略智數海  
內奇士也又曰子源天下義士

臧霸字宣高執義征暴清定海岱功莫大焉遷鎮東將  
軍位特進每有軍事常咨訪焉

南史臧燾字德仁宋武敬皇后凡少好學善三禮操行

為鄉里所稱武帝拜為太常雖外戚貴顯而彌自冲約所得祿俸與親戚共之子遂為宜都太守遂子凝之學涉有當世才文帝引見時上與何尚之論鑄錢事凝之便于其語次對傅僧祐止之凝之大言曰明主難再遇便應盡行所懷上與往復十餘反辭旨有詮序上深賞焉後為尚書左丞子寅次子稜後為叅軍稜子嚴字彥威幼有孝性居父憂以毀聞孤介未嘗造請多所諳記尤精漢書歷義陽武寧郡

守郡界蠻左獨以數門生單車入境羣蠻悅服嚴  
族叔永甄丁所生母憂三年廬于墓側歷江夏太守  
子盾字宣卿累遷御史中丞公性強甚稱職後為  
中領軍管天下兵要監局事盾為人敏贍有風力長  
於撥繁職事甚理盾弟厥字獻卿為晉安太守郡  
居山海常結聚逋逃上以二千石討捕不能止厥下  
車宣化凶黨皆襁負而出自是居人復業然政嚴百  
姓謂之臧虎前後再兼中書通事舍人卒於兼司農

鄉所掌之局大事及蘭臺廷尉所不能決者敕並付  
厥辯斷精明咸得其理卒後有過登聞鼓訴求付清  
直舍人帝曰臧厥既亡此事便無所付其見知如此  
子操尚書三公郎

臧熹字義和燾之弟也習騎射志立功名後領建平巴  
東二郡太守領竒兵平城都子質字含文出為建  
平太守甚得蠻楚心又歷巴東太守吏人便之年始  
三十屢居名郡好言兵文帝謂可太任以為徐兗二

州刺史魏太武攻盱眙質為輔國將軍救之報太武書以童謠言寇馬飲江水佛狸死卯年云云太武卒解圍而去上嘉質功以為雍州刺史

隱逸臧榮緒純篤好學隱居京口教授自號披褐先生

倉四百五十五

姓纂黃帝史官倉頡之後春秋時周有倉葛

左傳僖二十五年晉啓南陽陽樊不服倉葛呼曰德以柔中國刑以威四夷宜吾不服也



魏志倉慈字孝仁為長安令清約有方吏民畏而愛之  
遷燉煌太守抑挫權右撫恤孤羸一歲決刑曾不滿  
十人民夷翕然稱其德惠恤理有方為魏代之名  
守

北史孝行倉跋居母憂毀瘠見稱州里詔標門閭

唐 四百五十六

姓纂帝堯陶唐氏之後裔封唐侯周成王滅唐子孫  
以國為姓又左傳唐成公國于比陽今唐州是也

左傳僖十五年晉饑秦伯餼之粟曰吾聞唐叔之封也  
箕子曰其後必大晉其庸可異乎

尚書微子之命唐叔得禾異畝同穎獻諸天子王命唐

叔歸周公于東作歸禾

唐叔成王母弟後封晉

荀子非相今之世梁有唐舉相人之形狀顏色

相李斯蔡澤者

新序齊楚攻魏魏使人求救於秦秦救不出魏人有唐

且者年九十餘謂王曰老臣請西說秦令兵先臣出

可乎魏王曰敬諾遂約車而遣之且見秦王秦遂發

兵救之又秦興兵欲攻魏司馬唐且諫秦君曰段干木賢者也而魏禮之天下莫不聞無乃不可加兵乎秦君以為然乃按兵而輟

後漢方術唐檀字子產少遊太學習易詩春秋尤好災異星占教授常百餘人

晉唐彬字儒宗有經國大度而不拘行檢累遷郡別駕去奉使詣相府計事于時僚佐皆當世英彥見之莫不欽悅有廊廟材除尚書水部郎出補鄴令道德

齊禮朞月化成遷弋陽太守明設禁防百姓安之以  
平吳之功為右將軍

北史唐和字幼起初臣蠕蠕後歸魏太武優寵之待以  
為上客為濟州刺史甚有稱績徵為內都大官評決  
獄訟不加捶楚察疑實者甚多世以是稱之

唐邕字道和少明敏有才幹仕齊除中書舍人文宣嘗  
望并州城曰此何等城或曰金城湯池帝云我謂唐  
邕是金城此非也在齊一代典執兵機為趙州刺史

抑挫豪強公事甚理位至尚書令

唐永少耿介有將帥才讀班超傳慨然有萬里之志在  
魏為北地太守與賊戰未嘗敗北時語曰莫陸梁恐  
爾逢唐將遷為幽州刺史夷人送者當路遮留數日  
始得出境子瑾字附璘博涉經史雅好屬文雍容  
富文雅周文召拜尚書員外轉吏部尚書銓綜衡流  
雅有人倫之鑒為蔡州刺史歷拓州硤州皆有德化  
人吏稱之

唐書唐儉字茂系并州人事親以孝聞見隋亂陰說秦王建大計貞觀初使突厥

唐次字文編建中初及進士第竇參數薦之參被貶次為辯謗略三篇上之後憲宗嘗覽善之謂學士沈傳師曰凡君人者宜所觀省然編錄未盡卿可廣其書起周訖隋增為十篇更號元和辯謗畧

唐璿字休璟少孤授易於馬嘉運傳禮於賈公彥舉明經高第聖曆中授涼州都督吐蕃率騎寇涼州休璟

被甲先登六戰皆克西突厥舉兵相攻安西道閉  
武后詔休璟計議屯置盡如休璟策后曰恨用卿晚  
后謂楊再思等曰休璟練知邊事卿輩十不當一蓋  
休璟以儒者號知兵

唐臨字本德京兆人為萬泉丞尉有輕囚久繫方春農  
事興臨說令可且出囚使就畝畝不許臨曰有所疑  
丞執其罪令移疾臨恚縱歸與之約囚如期還獄俄  
持節按獄交州出冤繫三千人累遷大理卿高宗嘗

錄囚臨占對無不盡它日復訊餘司斷者輒紛訴不  
已獨臨所訊無一言帝問故答曰唐卿斷囚不寃所  
以絕意帝歎曰為獄者固當若是乃自述其考曰形  
如死灰心若鐵石云臨儉薄寡欲不好治第宅性旁  
通專務掩人過見妻子必正衣冠唐皎臨之兄

唐紹神龍時為太常博士

宋朝唐介字子方荆南人也舉進士遷著作郎為御史  
裏行三司使張堯佐一日除四使介與諫官包拯等



力爭卒奪堯佐二使項之復除介獨爭之不能得求  
全臺上殿不許自請從不報於是劾宰相文彥博獨  
專宰政凡有除授多非公議乞罷彥博而相富弼  
仁宗怒甚卻其奏不視且言將貶介介曰臣忠義憤  
激雖鼎鑊不避也即貶介春州別駕蔡襄言貶介太  
重會仁宗亦中悔明日改英州別駕又明日彥博  
罷而介自是以直聞天下復召為殿中侍御史他日  
介奏曰臣繼今言不行必將固爭爭之急或更坐黜

是臣重累陛下願聽解言職後為龍圖閣直學士  
英宗時召為御史中丞神宗即位遷給事中擢  
三司使遂拜參知政事介為人簡伉以敢言見憚  
神宗謂其先朝遺直也故大用之既卒諡質肅子淑  
問義問待問嘉問之問淑問嘗為御史

唐恪字欽叟錢塘人也四歲而孤舉進士嘗知榆次縣  
有愛在民召對為提舉河東常平徙江東轉運判官  
會祥柯獻地命以屯田員外郎往撫諭夷人始自疑

裏甲以逆之恪盡撤兵衛獨將駟卒數十人往夷人  
望見歡呼投兵聽命入為右司員外郎遷起居舍人  
恪言國家與契丹結好百有餘年邊備益弛宜及今  
無事時以漸為之不然且有後悔徽宗曰卿勉為  
朕行即以為集賢殿修撰河北都轉運使以右文殿  
修撰知滄州滄當河下流一日河決水至城下不沒者  
三板恪率官吏乘城救護有鹽塲正當下流使決之  
或曰益法重水決而壞且得罪恪曰殺吾身而全一

城吾之願也命趣決之踰宿而水去城以得全除延  
康殿學士知潭州時方崇尚道家言恪入辭從容言  
曰孔子之所以為道者曰毋意毋必毋固毋我老氏  
之所以為道者曰去甚去奢去泰今方士之言汗漫  
無稽宜無聽用且皆市井之庸流耳豈足與語聖人  
之至道哉

唐庚字子西眉州丹稜人也善屬文舉進士稍用為宗  
子博士張商英薦其才除提舉京畿常平庚為文精

密通於世務作明治察言閔俗存舊等篇學者稱之

皇四百五十七

風俗通云三皇之後因氏焉左傳鄭大夫皇頡

左傳襄九年宋使皇鄭命校正出馬工正出車備甲兵  
庀武守

襄十七年宋皇國父為太宰為平公築臺

宣十二年鄭皇戌使如晉師曰楚使驟勝而驕鄭師為  
承楚師必敗

成十八年鄭皇辰侵城郤取幽丘伐彭城

南史儒林皇侃吳郡人九世祖皇象為青州刺史侃少  
好學尤明三禮孝經論語為國子助教梁武召入壽  
光殿說禮記義帝善之加散騎侍郎

三國皇象字休明幼攻書得其妙中國善書者不能及

也

見廣陵志

光四百五十八

姓纂田光之後秦末子孫避地以光為姓

晉光逸字孟祖胡母輔之目為奇才俊器薦於東海王越以門寒而不召再薦越即辟焉與輔之等飲不捨晝夜時人謂之八達後為給事中

汪四百五十九

姓纂汪芒氏之後禮記有汪錡魯人也

汪藻字彥章狀其先公行實曰汪氏軒轅皆古國名春秋時童子錡以功顯魯孔子躋之中間譜系不傳至五季有自歙之黃墩徙婺源還珠者於公為九世祖

子孫因家焉用高貲為江佐著姓汪穀字次元生子  
彥章孫覲仲益誌其墓曰建炎紹興間天子仗一劍  
出入兵間以建中興之烈當是時公為中書舍人翰  
林學士一時之詔令往往多出公手學士大夫傳誦  
以比陸宣公後斥居永州年益高文益奇詩益工華  
妙精深與柳義曹相望於數百載後文章格力與其  
相上下子七人恬悟恪愴懽悻悻

襄四百六十



姓纂魯莊公子遂號襄仲子孫以謚為氏

後漢襄楷字公矩好學博古善天文陰陽之術桓帝時  
宦官專權上疏論災異之戒後舉方正不就鄉里宗  
之

桑四百六十一

姓纂秦大夫子桑之後以王父字為氏

晉書桑虞字子深仁孝自天父母喪毀瘠骨立廬于墓  
側五世同居閨門邕穆

唐桑道茂者寒人失其系望善太一遁甲術待詔翰林  
屢上言皆驗

五代桑維翰字國僑河南人也為人醜悴身短而面長  
常臨鑑以自竒曰七尺之身不如一尺之面慨然有  
志於公輔初舉進士主司惡其姓與喪同音有人勸  
其不必舉進士可以從它求仕者維翰慨然乃著日  
出扶桑賦以見志又鑄鐵硯以示人曰硯弊則改而  
他仕卒以進士及第晉高祖滅唐而興晉乃維翰之

力也繼拜平章事兼樞密使維翰狀貌既異素以威嚴自持晉之老將大臣無不屈服

洋四百六十二

海陵有此姓自云洋川侯之後

芳四百六十三

風俗通云漢有幽州刺史芳乘

嘗四百六十四

孟嘗君之後

良四百六十五

鄭穆公子去疾字子良孫良霄以王父字為氏漢有河  
間相良就又有良賀

湯四百六十六

殷湯之後以諡為姓宋有道人湯惠林

狼四百六十七

左傳晉大夫狼曠齊有狼蘧疏河南官氏志叱奴氏  
改為狼

囊 四百六十八

左傳楚莊王子貞字子囊之後子孫以王父字為氏其

孫令尹囊瓦字子常

蒼 四百六十九

風俗通云八凱蒼舒之後

傍 四百七十

西羌姓也

疆 四百七十一

左傳晉大夫疆劔後漢疆華又漢陽太守疆釋之並見

風俗通

羌

四百七十二

晉石冰將羌迪之也

印

四百七十三

漢公卿表御史大夫印

穰

四百七十四

風俗通田穰苴諸田之族子孫因氏焉高平姓苑云今

高平有穰氏

名賢氏族言行類稿卷二十七



欽定四庫全書

名賢氏族言行類稿卷二十八

宋 章定 撰

程 四百七五

姓纂顓頊重黎之後周程伯休父其後也

說苑孔子之郊遇程子於塗傾蓋而語終日有間顧子  
路曰取束帛一以贈先生

史記貨殖傳程鄭山東遷虜也能冶鑄富埒卓氏

前漢程不識為邊太守出擊胡能正部曲行陣軍不得

自便然軍雖煩擾虜亦不得犯並為漢名將

李廣傳

後漢儒林程曾字秀升習嚴氏春秋著書百餘篇皆五

經通難於建初間舉孝廉遷海西令

魏志程昱字仲德有謀能斷大事膽過賁育破走袁譚

袁尚拜奮武將軍 孫曉字季明為黃門侍郎

吳志程秉字德樞博通五經孫權聞其名儒徵拜太子

太傅 太子登曰將順其美正敕其惡誠所賴於傅

君也

程普字德謀性好施與喜士大夫領零陵江夏南郡太守遷盪寇將軍江表之虎臣也

晉書程衛字長玄少立操行疆正方嚴遷尚書郎侍御史在職皆以事幹顯補洛陽令歷安定頓丘太守凡所莅著績

南史程靈洗字玄滌少以勇力聞以戰功都督豫州刺史進號雲麾將軍號令分明與士卒同甘苦 子文

季字少卿多幹略果決有父風為超武將軍御下嚴  
整軍中服其勤幹每戰為前鋒齊軍深憚之謂為程  
彪

北史程駿字麟駒性機敏好學晝夜無倦容仕魏為著  
作郎獻文引與論易老義謂羣臣曰朕與此人言意  
甚開暢 詔曰駿歷官清慎言事每愜門無挾貨之  
賓室有懷道之士賜帛六百匹旌其儉德駿悉散之  
親舊性介直不競時榮

唐程知節濟州人事秦王從破王世充等後為隱太子  
諧之出為康州白秦王曰大王去左右手矣身欲全  
得乎知節有死不敢去事平遷右武衛大將軍

程務挺洺州平恩人父名振高祖使率兵經略河北即  
夜襲鄴縣俘男女千餘人以歸去數舍閱婦人方乳  
者九十餘人還之鄴人感其仁太宗征遼東召問方  
略不合旨帝勃然詰之名振辯對益詳帝意解謂左  
右曰房玄齡常在朕前見朕嗔餘人色不能主名振

生平未識我一旦誚讓而辭吐不屈奇士哉務挺少  
從父征討以勇力聞為單于道安撫大使禦突厥務  
挺善綏禦士服其威愛突厥憚之不敢盜邊

程昇字師舉京兆人以孝稱第明經補鄭尉精吏治厲  
已竭節至平章事嘗議置巡邊使憲宗問孰可者乃  
自請行身沒官第無留貲世重其廉

程千里京兆人魁岸有力擢金吾衛大將軍祿山反詔  
募兵河東即拜節度使會橋壞馬顛為賊執仰首敕

諸將曰為報諸將可失帥不可失城軍中皆為泣下  
增備固守賊不能下

程表師宋州人母病十旬不褫帶藥不嘗不進母終負  
土築墳常有白狼黃蛇馴墓左每哭羣鳥鳴翔刺史  
狀諸朝詔吏敦駕既至不願仕

程俱羅靈州人以孝聞李華為作孝贊表其行

宋朝程琳字天球永寧軍博野人也舉服勤詞學科中  
選召試除集賢院仁宗即位為三司戶部判官契丹

使來以琳為接伴使契丹使蕭蘊杜防蘊出坐圖謂  
琳曰中國使至契丹坐位高契丹使至中國坐位下  
請升之琳曰此真宗皇帝所定不可改也防曰大國  
之卿可乎琳曰南北兩朝安有大小防不能對仁宗  
令與宰相議或曰此特細事爾將許之琳以為許其  
小必啟其大力爭之乃拜右諫議大夫權御史中丞  
知益州召知開封府禁中火下府使治之琳曰此天  
災也不可以罪人仁宗為緩其獄卒無死者久之復



知開封府明年為三司使時議者患民稅多目吏得  
為姦欲除其名而合為一琳曰合而沒其名一時之  
便後有興利之臣必復增之是重困民也累遷吏部  
侍郎拜參知政事時元昊叛議者欲重賄唃廝囉使  
討元昊因其地以與之琳曰使唃廝囉有其地是去一  
元昊得一元昊也曷若用間使二羌不相合豈不為  
中國之利乎皇祐元年拜同中書門下平章事知大  
名府琳持重不撓前後守魏十年魏人愛之卒謚文

簡琳為人嚴深長於政事平時議論不少下人至朋僚故舊飲酒笑歌不復有勢位之間

程戡字勝之許州陽翟人也擢進士稍遷為侍御史知諫院以天章閣待制為陝西都轉運使徙知渭州知瀛州契丹使過稱疾求小饋見戡不許曰疾則可毋相見相見宜如禮使者竟不能屈進端明殿學士知益州召還為給事中參知政事英宗即位加安武軍節度使橫山酋豪請以兵乘塞而身以其屬取靈夏

歸中國戡奏言諒祚數悖慢而多殺戮人人離心今其酋豪如此可許之時英宗不豫大臣重生事不從卒謚康穆

程振字伯起饒州樂平人也少有俊才未冠游太學張商英陳瓘張庭堅鄒浩皆器之徽宗幸太學振以諸生高第得官留為辟雍錄欽宗受禪召拜吏部侍郎嘗上言大臣不協議論多駁詔令輕改失其事機如金人拏兵且半年而兵不解者以和戰之說未一故

也裁抑冒濫如黑白易分而數月之間三變其說者  
蓋廟堂不能忘私而多與其黨為地故也今一人言  
之以為是而行一人言之以為非而止或出聖斷隄  
度而不暇疇咨或用大臣偏見而遂形播告所以動  
未必善處未必宜乃輒為之反汗焉其勢不得不爾  
也及金兵至河北力請諸路兵犄角擊之以牽其勢  
且曰彼猖獗如此陛下猶欲守和議而不使之少有  
所懲創乎欽宗是其言而不能用也除開封尹為刑

部侍郎金邀天子幸其營求索不已振被命督與梅執禮等四人同死之

程羽字冲遠深州陸澤人也少好學舉進士太宗為開封尹以羽為判官太宗即位拜給事中知開封府未幾出知成都府為政寬簡蜀人便之以兵部侍郎致仕羽性淳厚凡事循謹太宗稱其長者

程顥字伯淳西洛人也顥舉進士為鄆縣簿呂公著為御史中丞薦為監察御史裏行前後進說甚多大要

以正人心窒物欲求賢育才為先神宗嘗使推擇人材顯所薦十數而以張載與其弟頤為首言人主當防未萌之欲神宗拱手曰當為卿戒之哲宗立召為大宗正丞未行而卒始顯從周敦頤論學故其言曰道之不明異端害之也昔之害近而易知今之害深而難辨昔之惑人也承其迷暗今之入人也因其高明自謂之窮神知化而不足以開物成務名為無不周徧而其實乖於倫理雖云窮深極微而不可以入

堯舜之道天下之學非淺陋固滯則必入於此自道  
之不明也邪誕怪異之說競起塗生民之耳目溺天  
下於汙濁雖高才明智膠於見聞醉生夢死不自覺  
也是皆正路之蓁蕪聖門之蔽塞闢之而後可以入  
道顯有經濟之術不幸早死文彥表其墓曰明道先  
生云弟頤

程頤字正叔以經術為諸儒倡四方從之游者甚眾哲  
宗即位司馬光呂公著上其行義於朝授汝州團練

推官西京國子監教授頤力辭又以為校書郎召至  
京師除崇政說書頤在經筵以師道自居每侍講色  
甚莊繼以諷諫頤聞哲宗在宮中盥而避蟻因講罷  
請曰有是乎哲宗曰然誠恐傷之耳頤曰推此心以  
及四海帝王之要道也崇寧初判西京國子監屏居  
伊闕山數年卒學者尊之稱為伊川先生其門人游  
酢謝良佐呂大臨楊明皆著名於世

彭

四百七六



姓纂大彭為商諸侯以國為姓蓋陸終第三子彭祖  
即大彭也

左傳成十六年鄭人聞有晉師告於楚救鄭彭名御楚  
共王潘黨為右

哀十七年子高曰彭仲爽申俘也文王以為令尹實縣  
申息封畛于汝惟其任也何賤之有

孟子彭更問曰後車數十乘從者數百人以傳食於諸  
侯不以泰乎

金史卷之八十八  
卷二十八  
史記彭越昌邑人

前漢彭宣字子佩淮陽人治易張禹薦其明經有威重  
可任政事入為右扶風遷御史大夫封長平侯宣為

人恭儉有法度

張禹傳

後漢彭寵字伯通南陽人

獨行彭脩字子陽會稽人也父為盜所劫脩年十五拔  
佩刀持盜帥曰父辱子死盜曰此童子義士也辭謝  
而去

蜀志彭羨字永平

北史彭樂字興驍勇善騎射從齊神武以軍功除肆州刺史邛山之戰獲魏督將僚佐四十八人諸將乘勝擊魏大破之樂言於高歡曰黑獺漏刃破膽矣

唐彭景直瀛州人景龍末為太常博士

宋朝彭乘字利建益州華陽人也舉進士與同年生登相國寺閣顧望鄉關皆有從官之樂乘獨悵然曰親老矣安敢捨晨昏之奉以圖一身之榮乎翌日奏乞

侍養以歸寇準薦名試為校勘遷秘書丞集賢校理  
求便親得知普州舊制蜀人不許赴蜀官特恩自乘  
始其後修注闕中書擬人乘在選中仁宗曰彭乘恬  
退之士也遂用之知開封府為翰林學士卒

彭汝礪字器資饒州鄱陽人也少嗜學舉進士為禮部  
第一王安石得其所著詩義善之以為國子監直講  
擢太子中允監察御史裏行汝礪首陳十事多人所  
難言者中人王中正李憲臨邊汝礪曰漢唐以兵付

中人多致敗事神宗折之汝礪拱立不動伺間復言  
神宗卒為改容罷為江西轉運判官陞辭復言今不  
患無將順之臣患無諫諍之臣不患無敢為之臣患  
無敢言之臣神宗察其忠慰諭久之元祐中除起居  
舍人拜中書舍人紹聖初進尚書罷知成都府又降  
待制知江州卒其平時與蔡確異趣確被貶又為之  
力辨人以此賢之 器資遺表有云土地已有餘願  
撫以仁財用非不饒願節以禮佞人雖若可喜而其

患在後忠言雖若可惡而其利甚深河北流移千里

無間然江南水潦九年于茲矣

見百家詩選

彭汝方字宜老汝礪之弟也知衢州立忠節贈龍圖閣

直學士

彭公永字君羨福州人紹興戊午擢進士第次子演蕭

國梁榜中甲科長子渙淳熙乙未繼登第 演字子

山嘉泰間嘗自江西召憲為吏部郎

平 四百七七

姓纂韓哀侯少子媯食采平邑因氏焉秦滅徙下邑  
前漢平當字子思以明經為博士傳經術言得失後為  
丞相子晏以明經歷位大司徒漢興惟韋平父  
子至宰相

北史平鑒字明達受詩禮通大義雅有豪俠氣後為懷  
州刺史魏將來攻城內有井隨汲即竭鑿具衣冠俯  
井而祝至旦而井泉湧溢

儒林平恒字維叔多通博聞安貧樂道不以屢空改操

魏徵為中書博士出為幽州別駕廉貞寡欲遷祕書

丞

英 四百七八

姓纂左傳英氏國臯陶之後以國為氏

史記黥布六人也姓英氏客相之曰當刑而王其後項

王立布為九江王 太史公曰英布者其先豈春秋

所見楚滅英六臯陶之後哉身被刑法何其拔興之

暴也



明 四百七九

姓纂虞仲之後公族有井伯即百里奚也生孟明視  
子孫以王父字為氏

南史明僧紹字休烈其先吳泰伯之裔 僧紹明經有

儒術隱居攝山栖霞寺 子山賓字孝若在梁首應

五經博士之選為兗州刺史雖出撫大藩擁旌推轂

珥金拖紫而恒事屢空嘗為國子博士兼祭酒累居

學官甚有訓導之益 弟少遐字處默位都官尚書

簡文帝曰我不喜明得尚書更喜朝廷得人後拜青  
州刺史 明氏自宋至梁為刺史者六人

北史明克讓字弘道博涉書史所覽將萬卷三禮論語  
尤所研精龜策歷象咸得其要十四為法曹參軍朱  
異嘗令詠修竹詩末云非君多愛賞誰貴此貞心異  
甚竒之後仕隋位率更令時東宮盛徵天下才學士  
至於博物洽聞皆出其下

循吏明亮字文德仕魏除陽平太守清白愛人甚有惠

政轉汲郡太守二郡人吏迄今追思之

唐明崇儼洛州人以奇技自名高宗四月憶瓜崇儼索百錢須臾以瓜獻曰得之侯氏老人圃中帝召老人問故曰埋一瓜失之土中得百錢

宋朝明鎬字化基密州安丘人也舉進士薛奎稱鎬有廊廟材遂除開封府推官權京東益州路轉運使歲歉民無積蓄盜賊間發鎬為平其物價募民為兵人賴以安知同州閱廂軍得材武者三百人教以彊弩

奏為清邊軍最驍勇其後陝西河東悉置此軍入知  
開封府王則反於貝州以鎬為安撫使城未下命文  
彥博宣撫河北以鎬副之貝州平以功遷端明殿學  
士彥博相以鎬參知政事未幾卒謚文烈

荆四百八十

姓纂楚熊繹國亦號荆支孫因氏焉

家語荆公行年十五而攝相事孔子聞之使人往觀其  
為政使者反曰其朝清淨而少事

史記荆軻為燕丹報仇餞於易水歌曰風蕭蕭兮易水  
寒壯士一去兮不復還及奉燕督亢圖進於秦皇圖  
窮而七首見

北史孝行荆可苦身勤力供養其母甘旨無匱乏母喪  
廬墓負土成墳周文令州縣表異之

宋朝荆罕儒冀州信都人也從孫嗣少應募為控鶴卒  
用兵前後凡一百五十餘戰未嘗無功亦未嘗自伐  
也積官至虢州防禦使

京 四百八一

卷二十八

姓纂鄭武公少子段封京謂之京城太叔因氏焉

前漢京房字君明東郡頓丘人本姓李推律定姓自改  
為京氏治易氏事梁人焦延壽延壽常曰得我道以  
亡身者京生也其說長於災變分六十卦更直日用  
事以風雨寒溫為候各有占驗房用之尤精房以孝  
廉為郎帝數召問對曰古帝王以功舉賢則萬化成  
瑞應著末世以毀譽取人故功業廢而致災異宜令

百官各試其功災異可息嘗諷用石顯凡三上封事  
極言災異

榮 四百八二

姓纂周大夫榮夷分榮叔其先食采於榮因氏焉

北史榮毗字子諶少剛鯁有局量涉獵羣言仕隋時為  
華州長史後拜侍御史在朝侃然正色為百寮所憚  
榮建緒毗之兄性甚亮直兼有學業仕隋歷始洪二州  
刺史俱有能名

成 四百八十三

卷二十八

姓纂周文王第五子邲叔武之後子孫以國為氏後  
為楚所滅子孫去邑為成成肅公桓公並為周卿士  
左傳楚大夫成得臣若敖孫也大心成熊並其後也  
左傳僖二十六年夔子不祀祝融楚成得臣帥師滅夔  
定八年晉師將盟衛侯於專澤趙簡子曰羣臣誰敢盟  
者成何曰我能盟之

成十三年劉康公成肅公會晉侯伐秦



文五年成大心帥師滅六

孟子成覲謂齊景公曰彼丈夫也我丈夫也吾何畏彼哉

南史孝義成景雋字超范陽人父安樂淮陽太守景雋後除豫州刺史有政績見懷

北史成淹字季文好文學有氣尚入魏授著作佐郎獻文欲冬月巡漠北朝臣諫並不納淹上接輿釋遊論帝覽之詔曰卿諸人不如成淹論通釋人意乃敕停

行 後齊散騎常侍裴昭明散騎侍郎謝竣如魏弔  
欲以朝服行事魏主客曰弔有常禮何得以朱衣入  
凶庭昭明等曰受命本朝不敢輒易往返數四昭明  
等固執不可魏主命著作郎上谷成淹與之言昭明  
等曰魏朝不聽使者朝服出何典禮淹曰吉凶不相  
厭羔裘玄冠不以弔此童穉所知也昔季孫如晉求  
遭喪之禮以行今卿自江南遠來弔魏方問出何典  
禮行人得失何其遠哉昭明日二國之禮應相準望

齊高皇帝之喪魏遣李彪來弔初不素服齊朝亦不  
以為疑何至今日獨見要逼淹曰齊不能行諒陰之  
禮踰月即吉彪奉使之日齊之君臣鳴玉盈庭貂璫  
曜目彪不得主人之命敢獨以素服廁其間乎皇帝  
仁孝侔於有虞執親之喪居廬食粥豈得以此方彼  
乎昭明日三王不同禮孰能知其得失淹曰然則虞  
舜高宗皆非邪昭明竣相顧而笑曰非孝者無親何  
可當也乃曰使人之來唯齋袴褶此既戎服不可以

弔唯主人裁其弔服然違本朝之命返必獲罪淹曰  
使彼有君子卿將命得宜且有厚賞若無君子卿出  
而光國得罪何傷自當有良史書之乃以衣帽給昭  
明等使服以致命已且引昭明等入見文武皆哭盡  
哀魏主嘉淹之敏遷侍郎賜絹百匹

卿 四百八四

姓苑有卿氏風俗通云虞卿之後戰國有卿秦為魏  
將或云項羽將卿子冠軍宋義之後

衡 四百八五

風俗通伊尹為湯阿衡子孫以衡為氏一云魯公子衡之後以王父字為氏

行 四百八六

周禮大行人之後

闕 四百八七

史記周文王四友闕天之後 漢有廣陵相闕孺

橫 四百八八

風俗通云韓公子成號橫陽君子孫氏焉見史記

訇

許橫反  
四百八九

蜀錄關中流人訇琦訇廣也

黥

四百九十

風俗通晉大夫呂甥子孫氏焉

邳

四百九一

邳叔之後或不去邑

城

四百九二

風俗通云姓於事城郭園池是也

營

四百九三

風俗通周成王卿士營伯之後

名

四百九四

楚大夫彭名之後以王父字為氏

羸

四百九五

伯益之後伯益作朕虞有功賜姓羸氏

盈

四百九六

晉大夫欒盈之後

聲

四百九七

蔡大夫聲子之後

嬰

四百九八

風俗通云晉大夫趙嬰齊之後

名賢氏族言行類稿卷二十八